


Residencia Oficial

Casi diescincio aña pasa enberdad nos tabata bisa: 'Cas di Gezaghebber', pero awor ta 'Cas di Gobernador', y prome cu aña 1848 (152 aña pasá) hende tabata jamé 'Cas di Commandeur'. Esey ta e residencia di e mandatario mas halto di Aruba. Jacobus Jarman Jr. tabata e ultimo commandeur di Aruba. El a sinta na aña 1839 como commandeur y na aña 1848 su titulo a cambia pa gezaghebber di Aruba. Su cas y oficina tabata den e mesun edificio. (mira foto #1).



Esaki tabata e residencia oficial den Kazernestraat. E edificio aki a wordo basha abao na aña 1949.

Esaki tabata situá caminda awor ta Plaza Daniel Leo banda p'ariba. Na aña 1929 e edificio aki a bira marinierskazerne. E tempo ayá e edificio aki tabata keda un 50 pa 60 meter for di canto di lama. Pesey e caya su dilanti te awe jama Kazernestraat.

Despues di gezaghebber Jarman, a bin gezaghebber H. Wagner, M. de Veer y I. Wagemaker. Tur a traha y biba den e edificio na Kazernestraat, cual a wordo basha abao na 1949.

Durante gobernacion di gezaghebber Wagemaker (na 1929), e residencia a muda pa Klip (foto #2). Antes nan tabata jama Klip, "Heintje Croes".

Gezaghebber Wagemaker mes a scohe e skina bunita aki pa traha su cas. Su oficina si a bai na e edificio cu awor tin oficinanan di gobierno, dilanti kerki protestant.

Despues e oficina a cambia di sitio diferente biaha. (Chabalito #9 - II) Pero e cas si a keda na e mesun lugar.

Despues cu gezaghebber Wagemaker a baha na 1945, a sinta varios otro gezaghebber, e.o.: L. Kwartsz, F. Beaujon, O. Henriquez, F. J. Tromp, F. Figaroa y P. Bislip. Tambe tabata tin diferente gezaghebber interino.

Den añanan '60 e cas a wordo drechá y varios mata di coco y otro matanan a wordo plantá.

E ultimo gezaghebber di Aruba cu a biba den e cas aki tabatagezaghebber F. J. Tromp na 1979. Desde e tempo ey e cas a keda será y a cuminsa verwal. E gezaghebbarnan cu a sinta despues a biba na nan mes cas. E ultimo gezaghebber tabata Sr. Pedro Bislip, kende a baha na aña 1985.

Despues di Status Aparte, Aruba no tabata tin gezaghebber mas. E mandatario mas halto a bira un gobernador, pasobra




Gezaghebber I. Wagemaker a laga traha e residencia aki na Klip.

Aruba ta riba su mes y mester di su propio gobernador.

Mientrastanto e cas di gezaghebber a haya un balente cambio (foto #3) y na 1986 a ricibi e prome gobernador di Aruba kende tabata Sr. Felipe B. Tromp.


Awe nos gobernador Sr. Olindo Koolman ta residenciá na e mesun lugar cu 70 aña pasá gezaghebber Wagemaker a scohe como un punto ideal pa construi e "palacio" di e prome mandatario di Aruba.

◀ E mesun residencia na Klip, pero despues di renovacion.



Fotos cortesía Archivo Historico Nacional y Joricuba

ICH



Chabalito

Number 3 - Año III - November, 2000 - Afl. 2,=



Gana Premio! • Di bishita na Venecia • Tips pa e temporada venidero! • Nos Aruba! •